

01

别席中兵诗

数年共栖息，一旦各联翩。
莫论行近远，终是隔山川。
长波漫不极，高岫郁相连。
急风乱还鸟，轻寒静暮蝉。
扁舟已入浪，孤帆渐逼天。
停车对空渚，怅望转依然。

02

夜泊巴陵诗

月夜三江静，云雾四边收。
淤泥不通挽，寒浦劣容舟。
回风折长草，轻冰断细流。
古村空列树，荒戍久无楼。

03

岁晚沉疴诗

风将夜共静，空与月俱明。
烛滴龙犹伏，垆开凤欲惊。
叶飞林失影，冰合涧无声。
太息兴床念，宁敢离衣行。
唯畏残藤尽，不闻桴鼓鸣。

04

对雨诗

当夏苦炎埃，习静对花台。
落照依山尽，浮凉带雨来。
重云吐飞电，高栋响行雷。
洒树轻花发，滴沼细萍开。
泛沫萦阶草，奔流起砌苔。
无因假轻盖，徒然想上才。

05

咏同心芙蓉诗

青山丽朝景，玄峰朗夜光。
未及清池上，红蕖并出房。
日分双蒂影，风合两花香。
鱼惊畏莲折，龟上碍荷长。
云雨留轻润，草木隐嘉祥。
徒歌涉江曲，谁见缉为裳。

06

舟中望月诗

大江阔千里，孤舟无四邻。
唯馀故楼月，远近必随人。
入风先绕晕，排雾急移轮。
若教长似扇，堪拂艳歌尘。

07

咏剪采花诗

浅深依树色，舒卷听人裁。

假令春已度，终住手中开。

08

咏贫诗

触途皆可试，惟贫独未安。
窗开两片月，霜足一重寒。
藁湿铺床冷，荷脆补衣难。
若言为客易，推剑与君弹。